

Sanhgyangh:

Geizgauj Ndaej Ndei Ciengj Hawj Byaleix

Ndwen 7 ngoenz 5, Sanhgyangh Duncuz Swciyen Gujyiz Cin Gyanghconh Siujyoz banh gij laex cuengqgyaj haggeiz seizcin bi 2019, aen hagdangz neix doenggvaq Guengjdoeng Guengjsae banggunz doxgap Guengjdoeng Sengj Vuzconh Si ndawbiengz gien simndei banggunz, daengx hagdangz 140 lai boux hagseng youq geizbyai gaujsi ndaej ciengj, hagdangz ciengj hawj duz byaleix 2 gaen lai naek caeuq daeh gojdung ndeu, hawj bohranz caeuq lwgnyez caez faenyiengj gij angqyangz gauj ndaej ndei, muengh daengxcungq hagseng hag ndaej ndei, daengzcog gauj ndaej daihhag, gikfat daengxcungq lwghag senj dieg banggunz anceiq haenx engq roengzrengz, daj iq laebceiq yungh sawda gajbienq diuzmingh.

Geij bi neix daeuj, Sanhgyangh baengh Guengjdoeng Guengjsae banggunz doxgap, haenqrengz doicaenh gyauyuz banggunz, doenggvaq gien cienz hwnjguh Gyanghconh Siujyoz caeuq Gyanghconh Cunghyoz, laeb cienzciengj banghag, baij lauxsae ndei bang sonsaw caeuq simndei banghag daengj banhfap lai, haenqrengz bang lwghag Mbanjdung lai doegsaw.

(Gungh Bujangh/龚普康)

► Lwghag riuj bya dauqranz.



▲ Canghfwen youq ndaw suenva goepingj MV.

Sanglinz:

Heiq Cingzgingj “Seiq Roek Lienz” Gyalai Gingjsaek Gyaundeidei

Seizndat ndatfwtfwt, ndaw suenva boux lauxsae duiyoh Hoz Daci Sanglinz Yen Dafungh Cin Lenzvahboh youh gyalai loh gingjsaek gyaundeidei ndeu. Ndwen 7 ngoenz 6, Veiz Youjcanh bouxswncienz Cungguk dandog Fwencuengh “seiq roek lienz” aen yienh neix gagmiz haenx, daiq doih bae ndaw suen goepingj MV 《Cingz Go Nuengx Mbanjcuengh》, vih fungfoux gij vwnzva neihanz aen dieg seiqgyaiq gyaesusouh aen yienh neix, bangrengz lijyouzyez aen yienh hwnj mbaeklae moq ok rengz.

Fwen “seiq roek lienz” dwg Fwencuengh, seizneix dan Namzningz Si Sanglinz Yen Hangyenz Cin miz, ndaej lied baenz swcigih gaep feihvuzciz vwnzva yizcanj. Geij bi neix daeuj, Sanglinz Yen ndaej cauhaeb baenz aen yienh lijyouz daegsaek Guengjsae, cingq haenqrengz cauhaeb dieg guhyiengh lijyouz gizdieg guekgya, haenqrengz hwngfat gij vwnzva Fwencuengh ndawbiengz.

(Lanz Couh/蓝洲)

Lozcwngz: Eu Fwen Haenh Aencingz Dangi

Ndwen 7 ngoenz 1, youq Lozcwngz Mulaujcz Swciyen Minzcuz Vwnzva Gvangjcanz, bouxgyaez fwen cingq eu fwen. Ngoenz haenx, Lozcwngz Mulaujcz Swciyen banh aen hoih fwen cawjdaez dwg “eu fwen haenh aencingz dangi”, 120 lai boux bouxgyaez fwen yungh go Bouxgun、Fwencuengh、Fwenmulau sam loh ciengqdiuq, eu ok ndwenngoenz moq roxnyinh moq, danqhaenh cwngcwz ndei dangj caeuq guekgya.

(Mungz Cwnghshw/蒙增师)



▲ Bouxgyaez fwen doiq fwen.

Gunghewngz Comz Yienjheiq Angqhoh Laebdangj 98 Hopbi



▲ Bouxyienj youq gwnz daiz diuqfoux.

Vih angqhoh Cungguk Gungcanjdangj laebdangj 98 hopbi, haenh gij ginglig rongh-lwenq dangj, gyalai gij rengz-gietcomz, byaujcanh senhcin, fatyengz heiqcingq, ndwen 7 ngoenz 1 banhaemh, Gungh-cwngz Yauzcuz Swciyen youq yinzminz veidanz ndaw yienh banh aen yizsi angqhoh laebdangj 98 hopbi daengj hozdung caeuq comz yienjheiq.

Youq mwh yienjheiq, daengx ciengz yienjok yungh gofoux 《Yauzcuz Angq Ciengq》

guh heiq haidaiz, biujyienj gofoux ndeiawj hawj bouxyawj yienhciengz gvaq yinx raixcaix. Riengzlaeng, go caezciengq 《Guekgya》《Vunz Cungguk》《Nyez Rauh Lungz Cungguk》langhbaij le gij cingsaenz ndei guekcoj daengzcog caeuq ndiepgyaez guekcoj; doeg sei 《Mbouj Lumz Goeknduj·Ciengxlwenx Gaen Dangj Byaij》bouxyienj cingsaenz gvaekgvaek, ndaej hawj bouxyawj dopfwngz haenh; siujbinj 《Ngoenzseng》hawj vunz raemxda doek doengzseiz hix hawj vunz ngeixnaemj、coi vunz haengguh baenaj.

Daengx ciengz yienjok cawjdaez mingzbeq, ndeiawj dangqmaz, danqhaenh le gij ginglig rongh-lwenq caeuq cingzcik lailai Cungguk Gungcanjdangj 98 bi, hawj gyoengq dangjyenz ginzcong youq mwh yawj heiq, gyalai roxyiuj dangj, doiq dangj lai miz cingz, yienh’ok dangjyenz caeuq ginzcong angqhoh laebdangj 98 hopbi caeuq hohfuk ngoenzcog guekcoj.

(Cwng Ciminj Cwngh Genminz/郑智敏 曾建民)